



Proxecto de Decreto polo que se integra no Servizo Galego de Saúde a unidade de diagnóstico por imaxe, na parte correspondente á unidade económica asociada á actividade de resonancia fixa dependente de Galaria, Empresa Pública de Servizos Sanitarios, SA.

Galaria, Empresa Pública de Servizos Sanitarios, SA é unha sociedade mercantil pública, de capital integramente subscrito pola Comunidade Autónoma de Galicia, adscrita ao Servizo Galego de Saúde, que foi constituída mediante o Decreto 229/1994, do 14 de xullo, baixo a denominación social de Instituto Galego de Medicina Técnica, SA (Medtec).

Por acordo do Consello de Administración do Medtec do 30 de xullo de 2008, recollido no Decreto 209/2008, de 28 de agosto, aprobouse o cambio de denominación social pasando a denominarse “Galaria, Empresa Pública de Servizos Sanitarios, SA”, con recoñecemento expreso da súa condición como medio propio instrumental e servizo técnico da Administración da Comunidade Autónoma de Galicia e dos seus organismos e entidades de natureza pública. Neste senso, Galaria, Empresa Pública de Servizos Sanitarios, SA ten por obxecto o desenvolvemento, execución e explotación de infraestruturas sanitarias, a prestación de servizos de consultoría no campo sanitario, así como a prestación de servizos relacionados co ámbito sanitario.

En abril de 2002 constituíuse a área de servizo compartido de diagnóstico por imaxe do Complexo Hospitalario Xeral Cíes, de acordo co previsto no Decreto 37/2001, do 1 de febreiro, de configuración de áreas de servizo compartido en estruturas hospitalarias do Servizo Galego de Saúde. Dende ese momento as persoas profesionais da Estrutura Organizativa de Xestión Integrada de Vigo veñen informando probas de resonancia.

En maio do 2016, con motivo da apertura do Hospital Álvaro Cunqueiro, aprobouse un plan de integración funcional da unidade de resonancia magnética na Estrutura Organizativa de Xestión Integrada de Vigo.

A partir de febreiro do 2018 este cambio organizativo fíxose efectivo pasando a organizarse o funcionamento da unidade de resonancia de Vigo a través dunha distribución en órganos e sistemas. Basicamente esta organización, que se levou a cabo dunha forma progresiva, supuxo a posta en marcha das áreas de mama, anestesia, abdome, neuroradioloxía, de tórax-cardiovascular, pediatría, columna e músculo esquelético. A partir dese momento, do mesmo xeito, a organización e as liñas de responsabilidade dentro do servizo, a coordinación das necesidades asistenciais, a xestión dos programas de xestión de calidade e, sobre todo, a xestión da demanda dos servizos clínicos, pasou a corresponderlle directamente á xefatura de





servizo da Estrutura Organizativa de Xestión Integrada. Finalmente, dentro deste proceso de integración funcional, en xuño do 2018, aprobouse dende a Xerencia do Servizo Galego de Saúde o plan operativo de integración funcional da unidade de resonancia magnética, no marco da área de servizo compartido de diagnóstico por imaxe da Estrutura Organizativa de Xestión Integrada de Vigo.

Xa transcorreu máis dun ano dende que se iniciou este último cambio no proceso de integración coa organización da unidade segundo un modelo de órganos e sistemas. Así, en liña co anterior, formúlase a integración definitiva no Servizo Galego de Saúde da unidade de diagnóstico por imaxe, na parte correspondente á unidade económica asociada á actividade asistencial de resonancia fixa, dentro da Estrutura Organizativa de Xestión Integrada de Vigo.

A disposición adicional terceira da Lei 12/2014, do 22 de decembro, de medidas fiscais e administrativas, establece o procedemento de reordenación de entidades instrumentais no ámbito sanitario aplicado á empresa pública de servizos sanitarios Galaria. Dispón que o patrimonio de Galaria, Empresa Pública de Servizos Sanitarios, SA, adscrito ás unidades asistenciais e administrativas que regulamentariamente se integren no Servizo Galego de Saúde e que resulte do proceso de liquidación conforme ao disposto na lexislación mercantil, incorporarase ao patrimonio do citado organismo autónomo. O Servizo Galego de Saúde subrogase en todos os dereitos e obrigas que teñen a súa orixe nesta unidade a partir da súa integración efectiva.

Engade a dita disposición adicional que o Servizo Galego de Saúde subrogase na totalidade das relacións laborais do persoal de Galaria, Empresa Pública de Servizos Sanitarios, SA que presta servizos nas unidades asistenciais e administrativas que regulamentariamente se integren, que manterá a natureza e o réxime xurídico do vínculo de orixe.

Dende un punto vista mercantil, para levar a cabo a reordenación da unidade descrita e posibilitar a súa integración no Servizo Galego de Saúde, Galaria, Empresa Pública de Servizos Sanitarios, SA acometeu unha operación mercantil de redución de capital con devolución de achegas ao seu accionista único, como vehículo de transmisión dos elementos adscritos á unidade titularidade da sociedade mercantil pública autonómica. Esta forma de transmisión é a prevista no artigo 53 da Lei 5/2011, do 30 de setembro, de patrimonio da Comunidade Autónoma de Galicia, aplicable a Galaria, Empresa Pública de Servizos Sanitarios, SA, que dispón que a Administración xeral da Comunidade Autónoma de Galicia e as entidades públicas instrumentais poden adquirir bens e dereitos por redución de capital de sociedades ou de fondos propios de entidades públicas instrumentais.

A redución de capital con devolución de achegas é unha operación mercantil que non





supón desembolso ningún por parte do accionista único de Galaria, Empresa Pública de Servizos Sanitarios, SA, pero que obriga á modificación do artigo 5º dos seus estatutos sociais na contía que representan os elementos de inmovilizado da súa titularidade afectos ás resonancias fixas da unidade de diagnóstico por imaxe.

A modificación estatutaria derivada da operación mercantil de redución de capital foi autorizada polo Consello da Xunta na súa reunión do xx de xxxxx de 2019, de acordo co disposto no artigo 105.2 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Mediante este decreto procedese á integración efectiva no Servizo Galego de Saúde, dentro da Estrutura Organizativa de Xestión Integrada de Vigo, da unidade de diagnóstico por imaxe, na parte correspondente á unidade económica asociada á actividade asistencial de resonancia fixa dependente de Galaria, Empresa Pública de Servizos Sanitarios, SA, quedando subrogado o Servizo Galego de Saúde en todos os dereitos e obrigas que teñen a súa orixe nesta unidade e na totalidade das relacións laborais do persoal de Galaria, Empresa Pública de Servizos Sanitarios, SA que presta servizos naquela, dando cumprimento á previsión que establece a disposición adicional terceira da Lei 12/2014, do 22 de decembro.

Este decreto foi tratado cos órganos de representación do persoal afectado e negociado na Mesa Sectorial de negociación do persoal das institucións sanitarias do Servizo Galego de Saúde.

Na súa virtude, a proposta do conselleiro de Sanidade e logo de deliberación do Consello da Xunta, na súa reunión do día xx de xxxxxxx de dous mil dezanove,

DISPOÑO

Artigo 1. *Obxecto*

1. Este decreto ten por obxecto a integración no Servizo Galego de Saúde de todas as funcións, servizos e medios materiais e persoais afectos á unidade de diagnóstico por imaxe, na parte correspondente á unidade económica asociada á actividade asistencial de resonancia fixa, titularidade de Galaria, Empresa Pública de Servizos Sanitarios, SA.

2. En virtude da referida integración, o Servizo Galego de Saúde queda subrogado en todos os dereitos e obrigas que teñen a súa orixe nesa unidade, e na totalidade das relacións laborais do persoal de Galaria, Empresa Pública de Servizos Sanitarios, SA





que presta servizos nela, de conformidade co que establece a disposición adicional terceira da Lei 12/2014, do 22 de decembro.

3. Os contratos de servizos afectos á unidade de diagnóstico por imaxe, na parte correspondente á unidade económica asociada á actividade asistencial de resonancia fixa que son obxecto de integración son os que se detallan no Anexo I.

Artigo 2. Traspaso de bens

1. Os bens de Galaria, Empresa Pública de Servizos Sanitarios, SA adscritos á unidade recollida no artigo anterior, incorpóranse ao patrimonio do Servizo Galego de Saúde con efectos xurídicos dende a data de entrada en vigor do presente decreto.

2. No prazo máximo de quince días dende a publicación deste decreto asinaranse as correspondentes actas de entrega e recepción de mobiliario, equipo e material inventariado correspondente á devandita unidade.

Artigo 3. Medios persoais

1. Intégrase no Servizo Galego de Saúde o persoal de Galaria, Empresa Pública de Servizos Sanitarios, SA que presta servizos na unidade citada no artigo 1, quedando subrogado o Servizo Galego de Saúde na totalidade das relacións laborais dende a data da entrada en vigor deste decreto, manténdose a natureza e o réxime xurídico do vínculo de orixe, estatutario ou laboral, así como o réxime económico.

2. O dito persoal, que figura relacionado nominalmente no anexo II, quedará adscrito á Xerencia da correspondente Estrutura Organizativa de Xestión Integrada.

3. O Servizo Galego de Saúde notificará a integración no organismo ao persoal afectado, e trasladará á correspondente Estrutura Organizativa de Xestión Integrada os expedientes persoais do dito persoal.

Artigo 4. Asunción de obrigas

1. O Servizo Galego de Saúde subrógase en todos os dereitos e obrigas que teñen a súa orixe nesta unidade de Galaria, Empresa Pública de Servizos Sanitarios, SA a partir da entrada en vigor deste decreto.

2. Os bens, dereitos e obrigas pertencerán ao Servizo Galego de Saúde nas mesmas condicións que lle pertencían anteriormente a Galaria, Empresa Pública de Servizos Sanitarios, SA.





Disposición transitoria única. *Tratado de período anterior á integración da unidade de resonancia fixa*

A percepción de ingresos e o pagamento dos gastos correspondentes aos dereitos devindicados ou ás obrigas contraídas con anterioridade á data de entrada en vigor deste decreto e imputables á unidade obxecto da integración, serán asumidas directamente por Galaria, Empresa Pública de Servizos Sanitarios, SA.

Disposición derradeira primeira. *Habilitación para o desenvolvemento normativo*

Autorízase a persoa titular da consellería con competencia en materia de sanidade para ditar as disposicións necesarias para o desenvolvemento do que dispón este decreto.

Disposición derradeira segunda. *Entrada en vigor*

Este decreto entrará en vigor o día 1 de xullo de dous mil dezanove.

Santiago de Compostela, de de dous mil dezanove

Alberto Núñez Feijóo
Presidente

Jesús Vázquez Almuiña
Conselleiro de Sanidade



ANEXO I

Relación de contratos de servizos:

OBXECTO DO CONTRATO	PROVEDOR	CATEGORÍA
RESONANCIA SIGNA HORIZON LX 1,5	GENERAL ELECTRIC	CONTRATO DE MANTEMENTO ALTA TECNOLOXÍA
RESONANCIA INTERA A CHIEVA NOVA 1,5	PHILIPS IBÉRICA	CONTRATO DE MANTEMENTO ALTA TECNOLOXÍA

ANEXO II

Relación do persoal que se integra no Servizo Galego de Saúde

DNI	APELIDOS E NOME	RÉXIME XURÍDICO	TIPO DE NOMEAMENTO	CATEGORÍA
***1992**	CEA PEREIRA, SONIA	ESTATUTARIO	PROPIETARIA	ADX. ESPECIALISTA AREA CON CE
***1065**	BENAVIDES RODRÍGUEZ, MERCEDES	ESTATUTARIO	PROPIETARIA	CELADOR/A AT. DIRECTA ENFERMO/A
***8388**	OTERO MONTERO, MARÍA TERESA	ESTATUTARIO	INTERINA EN PRAZA VACANTE	CELADOR/A AT. DIRECTA ENFERMO/A
***2902**	MAYO OBLANCA, ANA	ESTATUTARIO	INTERINA EN PRAZA VACANTE	ENFERMEIRO/A SERVIZOS CENTRAIS
***0298**	VILA FERNÁNDEZ, IVONNE	ESTATUTARIO	PROPIETARIA	ENFERMEIRO/A SERVIZOS CENTRAIS
***8990**	FERNÁNDEZ FARIÑA, PATRICIA	ESTATUTARIO	PROPIETARIA	GR. AUX. F. ADMVA. EQUIPO MEC.
***8526**	PINTO LOIS, MARÍA DEL CARMEN	ESTATUTARIO	PROPIETARIA	GR. AUX. F. ADMVA. EQUIPO MEC.
***6449**	VARELA DÍEGUEZ, AMALIA	ESTATUTARIO	PROPIETARIA	GR. AUX. F. ADMVA. EQUIPO MEC.
***9530**	BARROS PEÑA, MANUELA	ESTATUTARIO	PROPIETARIA	TÉCNICO/A ESPECIALISTA
***7874**	CID ABALDE, MERCEDES	ESTATUTARIO	PROPIETARIA	TÉCNICO/A ESPECIALISTA
***3335**	GARCÍA CRIBEIRO, MARGARITA	ESTATUTARIO	PROPIETARIA	TÉCNICO/A ESPECIALISTA
***9005**	GÓMEZ TRIGO, ÁLVARO	ESTATUTARIO	PROPIETARIO	TÉCNICO/A ESPECIALISTA
***6384**	SIMÓN FERNÁNDEZ, MARÍA DAS DORES	ESTATUTARIO	PROPIETARIA	TÉCNICO/A ESPECIALISTA